




Empowered lives.
Resilient nations.

Timor-Leste

Relatóriu Nasional ba Dezenvolvimentu Umanu 2018

Planeia Oportunidade ba Populasaun ida
ne'ebé sei Joven

Sumariu Ezekutivu



All rights reserved © 2018.
United Nations Development Programme (UNDP)

Front Cover:

© Jin Ni: A traditional Tara Bandu ceremony.

© Bernardino Soares: A girl carrying her good after return from Suai market.

© Martine Perret: Women from Cafe Cooperativa Timor factory sort out coffee beans in Dili.

© Bernardino Soares: Francisco Lobo, a final year student at UNTL, accessing books in the university library.

Back Cover:

© Jin Ni: A traditional Tara Bandu ceremony.



SUMARIU EZEKUTIVU

Introdusaun

Relatóriu Dezenvolvimentu Umanu (RDU) ne'ebé Programa Nasoens Unidas ba Dezenvolvimentu (PNUD) inisia iha tinan 1990, influensia ona debate dezenvolvimentu iha mundu tomak durante un-kuartu sékulu liu ba, no koloka ona rikeza vida umana iha rikeza ekonomia nia leten. Públikasaun RDU Global hala'ó kada tinan, no RDU nasional no rejional nian prepara periodikamente. *Relatóriu Nasional ba Dezenvolvimentu Umanu Timor-Leste tinan 2018: Planeia Oportunidade ba Populasaun ne'ebé sei Joven* mak hanesan RDU ba dahaat ba Timor-Leste.

Relatóriu Nasional ba Dezenvolvimentu Umanu (RDU Nasional) ida ne'e koloka juventude nia moris di'ak (*bem-estar*) hanesan sentru ba ajenda política.

Tamba sa mak juventude?


Timor-Leste iha maioria populasaun ne'ebé joven liu iha rejiaun Ásia-Pasífiku, ho idade média tinan 17.4. Situasaun ida ne'e kategoriza Timor-Leste hanesan nasaun ne'ebé nurak liu dala 15 iha mundu, depoiste Afganistaun no nasaun balun iha África. Populasaun ho idade seidauk



Nasaun joven liu iha mundo.



Idade mediu iha Timor-Leste.



Populasaun TL menus husi tinan 35.

to'ó tinan 35 hamutuk porsentu 74 husi total populasuan iha Timor-leste.

Nune'e, relatóriu ida ne'e responde ba aspirasaun

dezenvolvimentu juventude Timor-Leste nian, sira ne'ebé sei sai hanesan matadalan ba futuru dezenvolvimentu nasaun ne'e nian.

Tamba sa mak foka ba moris di'ak?

Ekonomista sira kontinua rekuñese katak kualidade moris diak mak objetivu ba dezenvolvimentu, enkuantu prosperidade ekonômika hanesan mekanizmu ida hodi bele atinzi objetivu ida ne'e.

Kiak no ema nia moris di'ak hanesan buat rua ne'ebé iha ligasaun besik ba malu, no kiak multidimensional hanesan maneira seluk hodi bele deskreve failansu iha moris di'ak. Aprosimasaun moris di'ak la limita deit ba konsiderasaun ekonômika.

Nia sei fornese mos perspetiva olístiku ida kona-ba polítika liu husi rekuñesimentu katak rezultadu dezenvolvimentu hanesan rezultadu ida husi interasaun entre fator sosioekonômiku, polítiku, kultural no ambiental bazeia ba kontestu istóriu.

Bainhira aplika aprosimasaun moris di'ak, relatóriu ida ne'e sei fornese oportunidade ba ema sira ne'ebé halo polítika atu adopta polítika, programa no investimentu estratéjiku ho alvu ba feto no mane foin-sa'e sira bazeia ba kumpriensaun kle'an ba sira nia aspirasaun, atitudi no hahalok. Relatóriu ida ne'e inovativu tebes: nia koloka sasukat moris di'ak iha sentru analize, hamutuk ho indise dezenvolvimentu umanu (IDU). Relatóriu ne'e mos fornese indise ba moris di'ak no dezenvolvimentu umanu entre foin-sa'e sira iha Timor-Leste, hamutuk ho IDU ba populasau tomak iha nasaun ne'e nia laran.

Liu tan, relatóriu ne'e mos uza kadru moris di'ak hanesan instrumentu polítika hodi gia esforsu atu atinzi nivel dezenvolvimentu umanu aas entre foin-sa'e sira no prepara kondisaun hirak ne'ebé nasaun ne'e prezisa hodi bele interpreta oportunidade demográfiku ba dividendu sosioekonômiku.


Objetivu final husi RDU Nasional mak atu sai matadalan ba sira ne'ebé halo desizaun kona-ba dalan ne'ebe sosiálmente inkluzivu no inovativu hodi bele atinzi nasaun ne'e ninia aspirasaun dezvoltimentu nasional liu husi juventude ne'ebé produtivu no partisativu, hodi kontribui ba ekonomia no sociedade ne'ebé sei kompativel ho potencialidade joven sira nian.

Tamba sa mak sira ne'ebé halo desizaun polítika tenki fo importansia ba juventude?

Mudansa estrutura idade populasaun Timor-Leste iha tinan hirak dadaun ne'e lori ona opsaun polítika ba iha kruzamentu ida. Situasaun demográfika atual iha potencialidade atu hala'o papel ne'ebé importante tebes ba formasaun dezvoltimentu nasaun nian iha futuru mai.

Tamba taixa labarik moris ne'ebé esepcionalmente aas iha tinan hirak liu ba, oras ne'e iha proporsaun populasaun ne'ebé boot, besik porsentu 40 mak kompostu labarik ho idade seidak to'o tinan 15.

Situasaun ida ne'e hamosu fali todan boot ba populasaun ho idade serbisu (tinan 15-64), Nasaun ne'e ninia indise dependensia ne'ebé aas refleta montante presau ekonômika husi populasaun dependenti (labarik no ema idozu/ferik-katuas sira, tipikalmente ho idade tinan 0-14 no tinan 65 ba leten) ba populasaun produtivu.




Tuir Sensu tinan 2015 nian, indise dependensia Timor-Leste nian mak 82. Ida ne'e signifika katak husi ema na'in 100 ho idade serbisu tenki apoia

ema na'in 82 ne'ebé la'os ho idade serbisu, no sira tenki apoia mos sira nia aan rasik.

Indise dependensia iha nasaun Sudeste Aziátiku seluk, hanesan Indonezia, Singapura no Tailândia, menus liu kompara ho indise iha Timor-Leste, kiikliu ho montante 37.

Situasaun ne'e indika katak, tamba ninia estrutura, populasaun Timor-Leste oras ne'e dadaun hasoru hela todan ekonômiku boot ida kompara ho populasaun iha ninia nasaun viziñu. Kada nasaun hasoru mudansa iha estrutura demográfika no iha ninia indise dependênsia hanesan redusaun iha taixa mortalidade no fertilidade. Redusaun ba indise dependensia fo oportunidade demográfiku ida ne'ebé bele dura to'o tinan 30 to'o 40.

MORIS DIAK/BEM-ESTAR NU'UDAR OBJETIVU NO MEIUS ATU ATINZI DIVIDENDU BA JOVEN



Se sustenta oportunidade ida ne'e liu husi política ne'ebé diak, nasaun ne'e bele goza dividendu demográfiku ida, ne'ebé bele lori benefisiu sosio-ekonômiku ba sosiedade.

Nasaun barak iha rejiaun Azia-Pasífiku hetan ona benefisiu husi dividendu demográfiku, maibe nasaun seluk la konsege realiza oportunidade ida ne'e. Iha rejiaun nia laran entre tinan 1970 no 2017, dividendu demográfiku kontribui ona ba pursentu 42 husi kresimentu ekonômiku iha nasaun dezenvolidu no pursentu 39 iha nasaun hirak ne'ebé sei dezenvolve hela. Populasaun Timor-Leste hetan ona redusaun iha fertilidade, hamosu possibilidade ba diminuisaun indise dependensia. Taixa fertilidade total tuun husi fetu ho oan na'in 7.8 ba 4.3 kada fetu ida ho idade reprodutiva entre tinan 2003 no 2016. Se karateristika redusaun ne'e kontinua, janela oportunidade demográfiku ida sei nakloke ba Timor-Leste iha dékada tolu tuir mai.

Situasaun ne'e sei fasilita nasaun ne'e atu hetan liu tan rekursu husi populasaun ne'ebé ekonomikámente ativu ba investimentu iha edukasaun, kuidadu saúde no setór produtivu hirak seluk ba dezenvolvimentu sustentavel.

Tuir estudu resenti ne'ebé hala'o bazeia ba análise ba konta transferênsia nasional (taixa apoiu ekonômiku), janela oportunidade demográfiku ida nakloke tiha ona iha Timor-Leste no sei kontinua nakloke ba dékada haat tuir mai.


Atinzimentu ba dividendu demográfiku la'os buat ne'ebé automatiku. Atu konverte oportunidade demográfiku ba dividendu demográfiku depende ba política estratéjiku, governasaun di'ak no empregu produtivu. Karateristika investimentu públiku tenki responde ba mudansa demográfika. Aselera inísiu tranzisaun demográfiku no realizaun potencialidade tomak ba dividendu ida depende ba opsaun política ne'ebé sei afeta prosesu ne'e. Nune'e, oras ne'e presiza konsentrasaun di'ak ba política no investimentu hodi bele hadi'a moris di'ak ba juventude fetu no mane sira.

Saida deit mak análize relatóriu ne'e dehan kona-ba juventude nia moris di'ak?

Realizasaun politika no investimentu ne'ebé di'ak hodi hadi'a moris di'ak prezisa kumpriensaun kle'an kona-ba valor, hahalok no aspirasaun juventude nian, no maneira juventude sira haree sira nia satisfasaun no esperiensa moris rasik.

Responde ba nesesidade atu hetan evidensia hanesan ne'e, relatóriu ida ne'e apresenta análize kona-ba kondisaun moris di'ak juventude nian iha Timor-Leste bazeia ba peskiza nasional ida ne'ebé Diresaun Nasional Estatística Timor-Leste nian hala'o ona iha fulan Agostu 2016. Peskiza Moris Di'ak Juventude iha Timor-Leste tinan 2016 ne'e foka liu ba aspetu (ka domíniu) ualu husi moris di'ak ne'ebé iha funsaun prinsipal hodi forma juventude nia moris, nune'e mos konsidera importante ba sustentabilidade iha futuru Timor-Leste nian. Domíniu ualu ne'e mak *saúde fiziku, saúde sikolójika (mentál), edukasaun, vitalidade iha comunidade, diversidade kultural, governansaun, jestaun ekolójika no padraun moris.*

Aspeitu kona-ba moris di'ak



Peskiza ne'e dezenia ona hodi bele inklui ema ho idade entre tinan 15 no 34 hanesan amostra/modelu ba nasaun ne'e ninia juventude. Selesaun ida ne'e halo ho razaun rua. Dahuluk, kategoria idade jeral fornese oportunidade atu estuda kestaun hirak relasiona ho juventude, nun'e mos sei permite desagregasaun entre grupu idade 15–24, ne'ebé difini hanesan juventude iha Polítika Nasional ba Juventude Timor-Leste nian.

Daruak, estudu barak mak esplora ona relasaun entre nasaun ne'e ninia estrutura populasaun no potencialidade boot ba konfliktu ne'ebé hatudu katak grupu idade tinan 25 to'o tinan 34 hanesan grupu ne'ebé iha influencia boot ba dame no estabilidade.



Rezultadu husi Peskiza Moris Di'ak Juventude nian ba Timor-Leste 2016 realsa realizasaun atinzimentu ida iha moris di'ak tomak ba juventude sira. Besik tres-kuatru husi total populasaun juventude iha Timor-Leste, mazumenus pursentu 74, mak goza ona satisfasaun nivel moderada to'o nivel altu ba dimensaun ualu husi moris di'ak nian.

Proporsaan ida ne'e fahe fali ba pursentu 71 entre mane sira no pursentu 76 entre feto sira. Kontrariamente, maizumenus juventude hamutuk na'in 32,550 (pursentu 10 husi grupu idade 15–34) mak nivel satisfasaun

kiik los iha dimensaun moris di'ak, signifika katak multidimensionalmente sira sei iha kondisaun kiak.

Mane barak liu mak hasoru susar iha sira nia moris di'ak, ho pursentu 11 kompara ho feto sira ho pursentu 9. Jeográfikamente, Munisipiu Ainaro mak iha proporsaun boot liu iha juventude ho moris susar, tuir kedas ho Munisipiu Manatuto no Dili. Kona-ba diferensia jêneru iha atinzimentu moris di'ak iha munisipiu oi-oin, Oecussi-Ambeno hatudu diferensa boot, ho pontu persentajen 26 benefisia liu mane, tuir kedas ho Bobonaro no Manufahi, ho pontu persentajen 18 benefisia liu feto.

Esplorasau ida ba rezultadu peskiza hodi identifika dimensaun hirak ne'ebé reduz moris di'ak juventude nian klarifika katak iha limitasaun boot iha area edukasaun no vitalidade komunidadade nian. Maioria joven mane no feto sira, mazumenus pursentu 88, hasoru limitasaun iha edukasaun.

Joven sira iha Timor-Leste dezempeña ladiak iha area edukasaun, hanesan alfabetizasaun, valor sívika prinsipal, kuñesimentu no abilidade iha Sékulu 21, inklui ko'alia iha públiku, abilidade atu maneija finansa, utilizasaun téknolojia bázika ba informasaun no komunikaun bázika no téknolojia (TIK) no kuñesimentu kona-ba prátika diak iha ijiene, nutrisaun no saúde.



Rezultadu mos hatudu katak joven sira la partisipa iha kualidade no variedade edukasaun ne'ebé adekuadu, oportunidade ba formasaun no dezenvolvimentu abilidade nune'e bele transisiona ho susesu husi edukasuan ba serbisu.

Entre respondentu peskiza sira, pursentu 82 (feto pursentu 87 no mane pursentu 77) laiha serbisu, no pursentu 46 deit mak eskola ka hala'o hela formasaun iha tempu peskiza (feto pursentu 44 no mane pursentu 49), ne'ebé sujere katak proporsaun boot ida husi joven sira laiha serbisu.



Edukasaun

Iha edukasaun baziku nu'udar nivel edukasaun ne'ebé aas liu



Hakarak atu kontinua estudu/treinamentu, maibé 1/3 de'it mak simu treinamentu.



Iha vitalidade komunidadade, rezultadu indika depreviasaun pursorentu 90. Rezultadu ida ne'e refleto relasaun komunidadade ne'ebé ladun di'ak ona entre joven sira, hamutuk ho nivel konfiánsa ne'ebé ki'ik no falta sentidu pretense ba ka hanoin kona-ba siguransa, no mós apoiu sosiál ne'ebé limitadu.

Hanesan ezemplu, peskiza ne'e akresenta katak joventudi fetu no mane sira preokupa tebes kona-ba siguru no siguransa iha sira nia komunidadade (maske nivel preokupasaun ne'e aas liu entre fetu sira), maibe justifika mos uzu violênsia. Apoiu sosiál ne'ebé komunidadade oferese ba joven sira la adekuadu.



Vitalidade Komunidadade

Fiar ema iha sira nia Komunidadade, 18% mak sempre hetan ajuda.



Tauk atu sai vitima husi gang violentu, sai ka fila ba uma iha kalan, ka ema kaer.

Limitasaun iha area edukasaun no vitalidade komidade hatudu momos ezistencia kondisaun sosiál ida ne'ebé hanaran anomia. Kondisaun ne'e mosu barak liu iha sosiedade ne'ebé foin rekupera husi konflitu, anomia mosu bainhira iha ona failansu ba maniera atu alkansa objetivu institusionál ne'ebé moralmente aseitavel, no ema hahuu uza maneira ne'ebé la étiku ka la legal hodi bele alkansa sira nia objetivu (haree iha kraik).

Iha estadu anomia, objetivu sai importante tebes nune'e ema koko atu alkansa ho kualker kustu. Rezultadu husi anomia, sei mosu bei-beik situasaun hirak hanesan delikensia, krimi no hahalok violentu interpesoal iha sosiedade nia laran. RDU Nasional ida ne'e akresenta katak sintóma anomia mosu entre joven Timor-oan sira no konsidera normal. Relatóriu ida ne'e propoin dalan polítika hodi bele solusiona anomia no hamenus susar atu moris di'ak entre juventude sira.

Oinsa mak IDU halo análise diferente kona-ba juventude no populasau jeral?

Relatóriu ida ne'e sukat IDU Timor-Leste nian ba tinan 2016 no depende eskluzivamente ba dadus nasional atualizadu. Relatóriu ne'e deskobre IDU ho valor 0.585 a populasau tomak no IDU ho valor 0.600 ba populasau juventude sira.¹

IDU sukat nivel jeral dezvoltimentu umanu iha sosiedade ida bazeia ba komponenti prinsipal tolu, hanesan, kapasidade hirak ne'ebé prezisa hodi bele hala'o moris ne'ebé naruk no saudavel, hodi bele alkansa padraun moris ne'ebé di'ak no atinzi asesu ba edukasaun. IDU rua ne'e koloka Timor-Leste ho ninia populasau joven ne'e iha variedade dezvoltimentu umanu médiu.

¹ Medida komposta iha oi-oin entre 0 no 1, 0 reprezenta laiha dezvoltimentu, no 1 reprezenta nivel aas liu husi dezvoltimentu.

Tanba deit sira nia idade, juventude sira goza saúde ne'ebé di'ak relativu ba grupu ho idade katuas-ferik. Sira mos iha oportunidade liu tan atu ba eskola. Maibé, juventude sira ladun iha asesu ba padraun moris ne'ebé di'ak kompara ho populasaun jeral tamba sira nia rendimentu ne'ebé kiik kompara ho adultu sira ne'ebé iha serbisu. Situasaun ne'e maioria mosu tamba juventude barak ne'ebé la tama iha forsa traballu ka dezempregu, nune'e iha moris ho rendimentu subsistênsia.

Juventude fetu sira hatudu indise dezenvolvimentu umanu ne'ebé ki'ik liu (0.571) kompara ho juventude mane sira (0.625), maibe dezigualdade jeralmente iha populasaun total.

Polítika saida deit mak sei promove dividendu demográfiku no juventude nia moris di'ak/bem-estar?

Bazeia ba IDU no avaliasaun ida ba moris di'ak juventude nian, no tuir oportunidade demográfiku ne'ebé iha, RDU Nasional ida ne'e sujere pontu polítika jeral tolu hodi bele realiza progresu.



1. Presiza investi liu tan iha saúde, edukasaun no ekonomia

Liu husi investimentu multi- setóral no polítika progresivu iha kuidadu saúde, edukasaun no ekonomia, bele iha projesaun katak Timor-Leste alkansa atinzimentu boot iha dezenvolvimentu umanu no indise dezenvolvimentu umanu ne'ebé aas ho 0.88 iha tinan 2050, nivel ida ne'ebé nasaun 20 ho valor dezenvolvimentu umanu aas goza ona iha mundu ohin loron nian.

Ida ne'e posivel ho scenariu polítika ne'ebé inklui buat hirak tuir mai ne'e:

- Aumentu iha tinan médiu no durasaun tinan iha eskola entre mane no fetu sira ba tinan 10 no 17, respetivamente, iha tinan 2050, nune'e hasai tiha lakuna jêneru iha Edukasaun
- Hasa'e prevalensia utilizaun kontrasepsaun husi porsentu 24 ba porsentu 39 iha tinan 2030 no porsentu 50 iha tinan 2050
- Melloramentu jerál iha efetividade setór públiku liu husi haluan fesibilidade merkadu traballu, efisiensia merkadu finanseira no aumentu aplikasaun Teknolojia Informasaun no Komunikaun (TIK)


Dividendu sosio ekonômiku sira seluk ne'ebé projeta atu mai husi scenariu polítika iha leten entre tinan 2015 no tinan 2050 inklui buat hirak tuir mai ne'e:

- Proporsaun dependensia sei tuun husi porsentu 83 ba porsentu 50.
- Sei salva kosok-oan na'in 62,000 nia vida no labarik na'in 70,000 ho idade seidauk to'o tinan 5 nia vida.²
- Bele evita mos mate maternal posivel hamutuk 5,100.
- Mane no fetu sira sei hetan tan espetativa moris adisional durante tinan 6 nia laran.
- Sei iha avansu profundu iha ekonomia tanba valor Produtu Internu Brutu (PIB) kada ema sei sa'e ho fator 6 iha tinan 15 nia laran. Krezimentu ne'e mos sei sai baze ba aumentu husi \$2,619 iha tinan 2015 ba \$15,374 iha tinan 2030.

Projesaun hirak ne'e esklaresa katak atinzimentu boot iha dezenvolvimentu umanu no dividendu demográfiku boot ne'ebé iha bele alkansa se intervensaun iha edukasaun no ekonomia kompleta tan ho utilizaun programa planeamentu familiar ne'ebé apropiadu.

² Na'in 70,000 ne'e inklui kosok-oan mate na'in 62,000 ne'ebé bele evita.

Nune'e, importante tebes ba Governu atu prokura polítika no investimentu simultâneu agora, nune'e bele haluan tan juventude sira nia asesu ba programa planeamentu familiar, enkoraza utilizaun kontraseptivu, garante katak juventude sira hela iha edukasaun durante tinan lima nia laran ka kleur liu tan, no hadi'a ambiêti ekonômiku.



2. Haku'ak modelu ekonômiku ida ne'ebé bele halakon limitasaun sira iha juventude nia moris di'ak/bem-estar

Modelu ekonômiku prezisa enkoraza juventude sira atu hetan kuñesimentu no abilidade hodi bele serbisu iha soliedaridade ho sira nia kolega no comunidade, nune'e bele kria benefisiu sosiál, ekonômiku no ambiental.

Konstrusaun ba sistema ekonômiku ida ne'e prezisa konsentra ba unifika fábrika sosiál, inkorpora étika sosiál iha sosiedade nia laran no hametin interese nasional, ne'ebé lakon ona durante períodu naruk husi kolonializasaun Portugés no okupasaun Indonezia durante tinan 24 nia laran. Sistema ekonômiku ida ne'e prezisa kuda valor demokrásia, justisa, fortelesimentu, kreatividade, partisipasaun no auto-jestaun.

Lider nasaun nian tenki tulun atu forma no dezenvolve alternativa sistema ekonômika ida ne'e hodi bele orienta juventude sira nia atitudi sosiál no ekonômiku iha maneira ne'ebé ema hotu hakarak, hodi bele restaura fali identidade komun no objetivu komun, nune'e mos bele promove kriasaun oportunidade serbisu ne'ebé joven sira kria-rasik, iha ne'ebé juventude sira bele dezenvolve sira nia potencialidade umana, nune'e mos bele fornese solusaun lokal ba dezafiu hirak ne'ebé sira nia comunidade hasoru.

Limitasaun serbisu hanesan kestaun antigu ida iha Timor-Leste. Juventude Timor-oan sira oras ne'e iha oportunidade ne'ebé limitadu tebes ba empregu formal.

Oportunidade hirak ne'e barak liu mak konsentra iha setór públiku, ne'ebé iha ema barak tiha ona. Entre juventude sira, porsentu 50 fiar katak sira la hetan asesu ne'ebé hanesan ba serbisu públiku, no porsentu 10 sente katak sira hetan deskriminasaun tanba sira nia idade, abilidade lingua, relijiaun, ka seksu.

Dadus hirak ne'e hatudu nesiedade atu muda bareira hirak ne'e no hakbi'it joven sira, liu-liu joven feto sira, nune'e atu bele hetan serbisu iha setór públiku no dezenvolve sira nia abilidade.

Setór privadu iha ninia faze desenvolvimentu inisiu no fornese empregu ba porsentu 5 deit husi forsa traballu. Setór Agrikultura hanesan setór prinsipal ne'ebé okupa porsentu 63 mane no porsentu 66 feto. Maske nune'e, maioria juventude ne'ebé hala'o serbisu agrikultura subsistênsia hakarak atu husik hela sira nia serbisu ne'e.

Iha tinan 2015, porsentu 45 husi populasauun ho idade serbisu la ativu, sira ne'e, barak liu mak estudante ka traballador doméstiku.

Iha espetativa boot entre sira ne'ebé remata ona eskola katak sira nia edukasaun sei lori sira ba serbisu iha setór formal. Maske nune'e, situasaun atual la hanesan ne'e entre graduadu sira husi Edukasaun no Formasaun Tékniku Profisional (TVET). Tuir Sensu 2015 nian, taixa dezempregu juventude nian iha area urbana sa'e ba porsentu 26. Tamba divizaun jêneru boot iha traballu, feto sira iha potencialidade metade deit kompara ho mane sira, relaciona ho hetan serbisu.

Iha kontestu aprosimadamente ema foun na'in 20,000 ne'ebé tama ba merkadu traballu kada tinan ho oportunidade serbisu ne'ebé limitadu, besik porsentu 70 husi juventude sira la kontenti ho númiru no variedade ba oportunidade subsistênsia ne'ebé disponivel ba sira.

Presiza iha estratejia efetiva hodi bele responde ba situasaun bainhira laiha korespondensia entre serbisu ne'ebé iha no fornimentu traballador. Política hirak ne'ebé iha presiza fo alvu ba serbisu no kriaun oportunidade entre juventude sira nune'e juventude sira bele iha kuñesimentu no abilidade hodi bele alkansa objetivu hirak ne'ebé sira valoriza.

Bainhira industria kontinua dezenvolve, presiza konsentra esforsu hodi haburas maneira inovativu hirak hodi promove emprendorizmu/negociu sosiál entre juventude sira, no muda juventude sira nia atitudi nune'e bele fasilita liu tan potencialidade atu hetan rendimentu liu husi empreza ki'ik no mos fasilita vontade atu kria liu tan iniciativa emprezarial hirak seluk iha setór agrikultura no setór hirak seluk iha ekonomia nia laran, ne'ebé hatudu potencialidade atu dezenvolve.

Iha promesa atu transforma sira ne'ebé buka serbisu no sira ne'ebé ekonómikamente la ativu ba emprededór/empezariu, liu-liu pursentu 62 husi populasau ne'ebé oras ne'e ho idade seidak to'o tinan 25.

Emprezariu sosiál mos bele tulun atu haforsa kualidade no motivasaun entre juventude sira, atu bele inspira sira hodi buka benefisiu ba comunidade duke profitabilidade ba ema individual.

Kondisaun ne'e sei posivel bainhira iha fasilitasaun ho insentivu no investimentu ne'ebé apoia juventude sira, nune'e bele hadi'a juventude sira nia asesu ba kapital finanseira, TIK no oportunidade ba desenvolvimentu kapital umanu.


Juventude balun apresenta ona abilidade ne'ebé prontu serbisu liu husi partisipasaun iha programa hirak ho apoiu doador sira nian, formasaun abilidade prontu serbisu ka serbisu imigrante iha ambiéti ne'ebé kompetitivu liu iha rai li'ur.

Maske presiza enkoraza sira atu pratika sira nia abilidade, iha buat barak ne'ebé presiza halo hodi bele fasilita liu tan juventude sira nia asesu ba

oportunidade de desenvolvimento, habilidade de negócios e habilidade técnica. Liu tan, responsabilidade e promoção de empresa social tenki mós halo iha munisípiu, la'os deit iha Dili.


Asaun ne'e sei fo oportunidade liu tan ba juventude sira atu hetan habilidade, konfiansa no sentidu orgullu hodi bele tama ba desenvolvimento de empresa social ne'ebé sei tulun sira nia comunidade nune'e bele sai husi kiak no mukit.

Atu promove desenvolvimento ekonómiku liu husi empresa social, Governu bele adopta insentivu iha grupu estratéjia de desenvolvimento ba kriaun serbisu, nune'e mos ligasaun entre industria ne'ebé forma tiha ona. Ida ne'e sei tulun atu estabelese grupu



hanesan pontu konsentrasaun ida ba grupu de desenvolvimento, ne'ebé sei utiliza nasaun nia forsa relativu iha na'in ba rai tradisional (rai adat nian) no agrikultura ki'ik.

Kategoria signifikativu seluk husi grupu de desenvolvimento mak kuidadu saúde, de desenvolvimento comunidade no eko-turizmu. Grupu ida ne'e sei depende ba nasaun ne'e nia forsa relativa liu husi sistema kuidadu saúde nasional ida ne'ebé iha pesoal sufisienti, maibe ladun finansia ho didiak, reziliensia comunidade no potencialidade boot ba turista, nune'e mos elimina defisiensia iha kuidadu saúde pública, vitalidade comunidade no de desenvolvimento turizmu.



3. Investimentu iha edukasaun no dezenvolvimentu juventude ba sociedade ida ne'ebé iha kuñesimentu:

Prekondisaun importante ida hodi bele hetan benefisiu husi dividendu demográfiku no alkansa dezenvolvimentu umanu iha nasaun ne'ebé de'it mak ninia investimentu públiku ba asistensia ne'ebé produz kuñesimentu. Ida ne'e sei garante asesibilidade ba oportunidade entre ema hotu iha faze inisiu no durante sira nia síkulu moris nian.

Povu Timor-Leste iha aspirasaun ba sociedade ida ne'ebé hatene koalia, lee no hakerek (alfabetizada), iha kuñesimentu no abilidade. Planu Dezenvolvimentu Estratéjiku Nasional ba Timor-Leste estabelese ona vizaun ida hodi garante kompleksaun eskola sekundária universal to'o grau 12 to'o tinan 2030. Maske nune'e, atu implementa vizaun ida ne'e, Governu prezisa duplika investimentu públiku iha edukasaun, inklui investimentu boot ba formasaun manorin, fasilidade edukasaun ho kualidade aas no empregu ne'ebé apropriadu ba manorin na'in sira.

RDU Nasional ida ne'e sujere katak Governu bele adopta prátika diak internasional nian no konsidera aloka porsentu 25 husi ninia orsamentu ba setór edukasaun no formasaun hodi garante asesu ba edukasaun ho kualidade entre juventude feto no mane sira. Asaun ida ne'e sei hametin liu tan kapasidade umana ne'ebé signifkativa.

Hasa'e deit despeza pública sei la garante kualidade edukasaun ne'ebé aas. Investimentu ne'ebé iha tenki garante katak iha mos apoiu manorin na'in ho kualidade no fasilidade ho kualidade aas iha sistema edukasaun nia laran, inklui asesu ba biblioteka, material rekursu, no ekipamentu.

Edukasaun mos tenki hetan orientasaun husi kuríkulu ida ne'ebé iha balansu diak no haburas aplikasuan teorética no prátika. Esperienzia iha fatin seluk hatudu katak hasa'e kompleksaun taixa eskola to'o grau 12

bele sai hanesan fator kontribuidor boot hodi hamenus dezemprezu iha juventude sira. Oras ne'e sei iha defisiensia iha Timor-Leste nia edukasaun tamba dezvantajen jêneru.

RDU Nasional ida ne'e sujere katak diferença jêneru iha edukasaun tenki maneija liu husi aprosimasaun kompreénsiva ida ho intensaun atu alumina kustu escolar hotu, fornese formasaun no kria empregu ba manorin sira ho númiru natoon, no haluan kobertura programa merenda eskolar ba eskola sekundária to'o ba grau 12. Tenki garante ambienti edukasaun edukasional ne'ebé responde ba diversidade nesesidade kanorin sira nian, liu husi polítika no prátika edukasaun inkluziva, nune'e bele kria ambienti aprendizazen ne'ebé halo juventude sira sente seguru no motivadu.

Presiza kontinua komunika valor edukasaun ba inan-aman sira no comunidade, nune'e bele hadi'a retensaun kanorin sira, liu-liu entre juventude feto sira ne'ebé atu tama ona ba idade puberdade. Presiza mos atu halo reforma edukasaun seluk ne'ebé bele hetan benefisiu husi dividendu juventude iha Timor-Leste.

Sistema edukasaun tenki motiva juventude sira atu envolve ativamente iha sociedade molok sira husik hela eskola no enkoraza mos sira atu responsavel liu tan hodi hanoin kona-ba sira nia futuru. Atu bele hamosu situaun ne'e, juventude sira tenki hetan apoiu apropiadu liu husi edukasaun formal no non-formal ne'ebé iha qualidade aas, programa literasia TIK, sentru informasaun no konselu husi profesional kareira sira.

Setór Agrikultura hanesan empregador boot liu iha nasaun laran; nune'e edukasaun tenki diriji ba aspetu ne'ebé benefisia forsa serbisu iha setór ida ne'e. Aprosimasaun foun no inovativu ida hodi bele aprende kona-ba subsistênsia rural ne'ebé orienta ba prosesu resolve problema bele haforsa no intensifika agrikultura subsistênsia nune'e bele produz benefisiu konfiável, kria merkadu local ba produktu ai-haan no maneija

problema nutrisaun. Presiza oferese mos unidade hanorin foun ne'ebé iha relevansia prátika ba oportunidade ekonômiku iha area rural, hanesan turizmu, peska, solusaun enerjia moos, arte-sanatu no fabrika-roupa.

Eskola sekundária tenki garante dezvoltimentu abilidade iha planeamentu, organizasaun no jestaun, no kontabilidade no manutensaun rejistu finanseiru, inklui uza instrumentu elektrónika.

Abilidade hirak ne'e presiza ba kualker profisaun, bainhira estudante ida sai agrikultor, traballador konstrusaun, traballador serve hahan, espesialista enerjia sustentavel, ka diretor ida iha departamentu assistensia pública. Tenki fo esforsu hodi dezvoltolve abilidade hirak ne'ebé la hanorin iha aula laran, hanesan serbisu iha ekipa, ko'alia iha públiku, abilidade organizasuan, halo desizaun demokrátiku, esplora natureza, no rezolusaun konflitu.

Buat hirak ne'e bele atinzi liu-husi kolokasaun serbisu komplimentáriu ka edukasaun non-formal hodi involve juventude iha ekonomia soliedaridade molok sira remata eskola. Importante mos atu hasa'e kuñesimentu finanseira entre juven sira. Situasau ida ne'e bele rezolve liu husi instituisaun edukasaun formal no non-formal, bankária no la'os-bankária.

Se garante asesu ba finansa liu husi kuñesimentu ka literasia finanseira ne'ebé diak, sei fasilita liu tan juventude sira atu partisipa iha ekonomia solidária no hala'o inisiativa dezvoltimentu emprezarial.

Presiza estabelese instituisaun formasaun foun iha munisipiu (la'os Dili) hodi bele kria sentru lokal hirak ne'ebé bele hamosu no fasilita diskusaun entre empregador, edukador no autoridade munisipiu sira.

Analize ba abilidade no empreza ne'ebé presiza iha munisipiu no inisiasaun ideia foun bele mosu iha sentru lokal hirak ne'e, ne'ebé bele

fasilita juventude sira ne'ebé husik hela eskola ba prosesu orientasaun ida relasiona ho sira nia vida hafoin husik tiha eskola.

Organizasaun ekonômika sosiál no solidária hirak hanesan koperativa kafe lokal, grupu klienti mikrofinansa, koperativa kreditu no edifisiu komersiu justu, bele iha funsaun prinsipal hodi tulun estudante sira iha tipu sentru aprendizazen foun ida ne'e, nune'e bele hakro'at liu tan sira nia abilidade organizasaun no jestaun.

Iha Timor-Leste, ema barak seidak hetan benefisiu husi revolusaun industrial ne'ebé mosu ona iha mundu tomak hahuu kedas husi Sékulu 18. Suku barak mak sei depende ba teknolojia baisu, no juventude sira nia asesu ba teknolojia informasaun no komunikasaun (TIK) sei limitadu tebes.

Durante revolusaun industrial ba dahaat, ne'ebé involve ona robótika, intelejênsia artifisial, bioteknolojia, no teknolojia inovativu hirak seluk iha era dijital, nasaun viziñu iha rejiaun laran dezenvolve estratéjia dijital adekua, adopta polítika governasaun intelejenti no harii infraestruturá redi dijital ida hodi bele haforsa baze rekursu umanu.

Klaru katak sosiedade ho kuñesimentu no inovasaun no ema nia imajinasaun sai hanesan aspetu prinsipal hodi bele dezenvolve solusaun intelijenti ba problema kompleksu umanidade nian. Atu bele aproveita avansu atual iha teknolojia, Timor-Leste presiza aumentu dramátiku iha ninia eskala investimentu iha ekosistema TIK ida ne'ebé difunde fahe kuñesimentu no dezenvolvimentu umanu entre juventude sira. Teknolojia bele tulun atu hasa'e valor kreatividade, empreendedorizmu no administrasaun iha sosiedade Timor-Leste nian. Maske nune'e, ambienti TIK mos presiza apoia redi descentralizadu ba komunikasaun entre ema, fahe kuñesimentu no edukasaun.

Halo deit formasaun kona-ba dijital simples no literasia elektrónika sei la natoon. Governu tenki involve aan iha estratejia determinadu ne'ebé

enkoraza sidadania elektrónika ka e-sidadania, hamutuk ho polítika ne'ebé bele hakat ba aumentu asesu públiku ba TIK, ne'ebé bele promove partisipasaun diak husi sidadaun, inovasaun no dezenvolvimentu empreza sosiál.

RDU ida ne'e fo émfaze fila fali ba importansia investimentu publiku ne'ebé adekuadu no fo alvu didiak iha dezenvolvimentu umanu iha Timor-Leste iha dékada tolu tuir mai. Ninia intensaun mak atu facilita individu hotu bele dezenvolve kapasidade fiziku, emosional no sosiál ne'ebé haforsa liu tan atinzimentu moris dí'ak.

Prinsipiu orientador mak konfiánsa desesiva ba kreatividade Timor-oan nian no nesiedade ema no koletividade ba dezenvolvimentu umanu. Dezenvolvimentu umanu importante ida ne'e sei transforma ba valor koletiva sosio-ekonômiku, nune'e sei forma sírkulu virtuozu ida. Importante tebes ba Timor hanesan nasaun foun iha Ázia atu adopta dezenvolvimentu umanu hanesan pre-kondisaun ba konstrusaun nasaun.

Sumariu Rekomendasaun Prinsipál Sira

Halo investimentu boot no kualidade agora iha kuidadu saúde, edukasaun no ekonomia

- Uza pratika intersionál diak sira no aloka 25% husi orsamentu governu ba edukasaun no treinamentu.
- Atinzi objetivu nasionál ba kompleta eskola universál sekundariu iha tinan 2030 liu husi hasa'e taxakompleta eskola to grau 12 ba fetu no mane hotu, nune'e hasai tiha lakuna jeneru.
- Hadiak edukasaun ho profesoresne'ebé iha abilidatade, fasilidade ne'ebé apropiadu no kualidade ho kurikulumu ne'ebé iha balansu-diak.
- Haluan joven sira nia asesu ba kuidadu saúde no planeamentu familiár atu salva-guarda liberdade no direitu nune'e familia sira bele hili numeru no tempu ba sira nia oan.
- Hasae eskala investimentu drastikamente ba iha ekosistema TIK (Teknolojia, Informasaun no Komunikasaun).

Adopta modelu ekonomia atu kura joven sira nia deprivasaun iha moris-diak/bem-estar

- Enkoraza sistema ekonomiku ne'ebé tau hamutuk fabrika sosiál, hatama etniku sosiál iha sosiedade no reforsa interese nasional aas liu individu.
- Promove valór ba demokrasia, justisa, fortesimentu, kreatividade, partisipasaun no jestaun-individuál.
- Transforma ema ne'ebé buka serbisu no sira ne'ebé la-ativu ekonomikamente ba ha emprendedór, reaosiu sosiál liu husi altera joven sira nia atitude nune'e iniciativa emprendedorismu/harii negosiu potensial barak liu mak bele realiza.

- Estabelese grupu estratejiku nu'udar pontu fokal ba investimentu no kriasauñ serbisu no adapta insentivu ba dezvoltimentu empreza sosial iha nia laran, enkuantu forma ligasauñ entre industria sira.

Investe iha edukasauñ no dezvoltimentu juventude nian ba kuñesimentu-bazeia ba sociedade

- Hadiak tranzisaun husi eskola ba serbisu liu husi kualidade edukasauñ, kolokasauñ serbisu komplementariu, programa literasia TIK, sentru informasauñ no profesionál konselu ba kareira.
- Fornese oportunidade ba dezvoltimentu ailidade iha planeamentu no jestaun, manutensaun-rejistu finansieru, sasan elektronika nune'e mós abilidade hanesan servisu-ihá-ekipa, koalía iha publiku, voluntarismu, no rezolusaun konfliktu.
- Oferese material hanorin ne'ebé iha pratika relevante ba oportunidade ekonomia iha area rural, hanesan turismu, peskas, solusaun enerjia moos, konstruir, no halo-ropa.
- Aselera uza liu tan TIK hodi suporta rede ba komunikasauñ entre erna, fahe kuñesimentu no edukasauñ ne'ebé descentraliza.
- Hasae joven sira nia literasia finansieru hodi bele hetan asesu diak liu ba kapital finansial hodi suporta empededorismu/negosiu sosial.

“Buat ne’ebé importante liu iha moris maka dignidade. Ema ida bele hetan dignidade liu husi hetan abilidade nó servisu ne’ebé di’ak. Sei laiha serbisu ne’ebé diak, ema bele lakon ninia dignidade fasil tebés.”

*Partisipante ida husi
diskusaun iha grupu foku nian*





Asesu ba relatoriu kompletu:

<http://bitly/TLNHDR2018>

Tuir Konversasaun:

#RDUTL

#InvesteAGORA #JovenTL #MorisDiak





UN House,
Caicoli Street, P.O. Box 008,
Dili, Timor-Leste

www.tl.undp.org

*Empowered lives.
Resilient nations.*

